

U R E D B A
O STIPENDIRANJU REDOVNOG STUDIJA BRANILACA I
ČLANOVA NJIHOVIH PORODICA

Službene novine ZDK 4/14, 1/18 i 15/21 - kompilirani tekst

DIO PRVI - OPĆE ODREDBE

Član 1.
(Predmet Uredbe)

Ovom Uredbom utvrđuju se uvjeti, način i postupak ostvarivanja prava na dodjelu stipendija studentima - braniocima i članovima njihovih porodica, koji su srednje obrazovanje stekli u školama na području Bosne i Hercegovine, za redovni studij na visokoškolskim ustanovama.

Član 2.
(Redovni studij)

Redovni studij na visokoškolskim ustanovama u smislu ove Uredbe obuhvata redovni i samofinansirajući studij prvog i drugog ciklusa Bolonjskog sistema studiranja.

Član 3.
(Korisnici prava)

Pravo na dodjelu stipendije po ovoj Uredbi mogu ostvariti:

- a) dobitnici ratnih priznanja ili odlikovanja;
- b) ratni vojni invalidi;
- c) demobilizirani branioци koji su u periodu od 06.04.1992. do 23.12.1995.godine u sastavu Oružanih snaga proveli najmanje 24 mjeseca odnosno 12 mjeseci, ukoliko su u OS pristupili kao maloljetno lice ili 6 mjeseci po punoljetstvu;
- d) članovi porodice šehida, poginulih, umrlih i nestalih branilaca i umrlih ratnih vojnih invalida;
- e) članovi uže porodice poginulih, umrlih ili nestalih dobitnika ratnog priznanja ili odlikovanja;
- f) djeca dobitnika ratnih priznanja ili odlikovanja - do navršene 30. godine života;
- g) djeca ratnih vojnih invalida - do navršene 30. godine života;
- h) djeca demobiliziranih branilaca koji su u periodu od 06.04.1992. do 23.12.1995.godine u sastavu Oružanih snaga proveli najmanje 24 mjeseca odnosno 12 mjeseci, ukoliko su u OS pristupili kao maloljetno lice ili neposredno po punoljetstvu - do navršene 30. godine života.

Član 4.
(Posebni korisnici)

Prava po ovoj Uredbi može koristiti i:

- a) dijete šehida, poginulog, umrlog, nestalog branioca, kojem je prestalo pravo na porodičnu invalidninu - do navršene 35. godine života;
- b) dijete poginulog, umrlog ili nestalog dobitnika ratnog priznanja ili odlikovanja, osim lica iz tačke a) ovog člana, kojem je prestalo pravo na mjesečni novčani dodatak i dijete umrlog ratnog vojnog invalida koje nije korisnik prava na porodičnu invalidninu - do navršene 30. godine života;
- c) dijete umrlog demobiliziranog branioca koji je sa istim živjelo u zajedničkom domaćinstvu ili ga je isti izdržavao najmanje posljednju godinu dana prije smrti - do navršene 30. godine života.

Član 5. **(Pojmovi i definicije)**

- (1) Pojmovi korišteni u Uredbi: dobitnik ratnog priznanja ili odlikovanja, ratni vojni invalid, demobilizirani branilac, učesnik rata, član porodice šehida, poginulog, umrlog, nestalog branioca i umrlog ratnog vojnog invalida i član uže porodice poginulog, umrlog ili nestalog dobitnika ratnog priznanja ili odlikovanja, upotrijebljeni su u skladu sa odredbama Zakona o pravima branilaca i članova njihovih porodica ("Službene novine Federacije Bosne i Hercegovine" broj 33/04, 56/05, 70/07 i 9/10) i Zakona o posebnim pravima dobitnika ratnih priznanja i odlikovanja i članova njihovih porodica ("Službene novine Federacije BiH" broj 70/05, 61/06 i 9/10).
- (2) Djetetom dobitnika ratnog priznanja ili odlikovanja/ratnog vojnog invalida/demobiliziranog branioca, u smislu ove Uredbe, smatra se dijete rođeno u braku/van braka, usvojeno dijete, kao i pastorce koje je sa istim živjelo u zajedničkom domaćinstvu najmanje posljednju godinu dana.

Član 6. **(Dokazivanje statusa)**

U postupku ostvarivanja prava po ovoj Uredbi, branioci i članovi njihovih porodica svoj status dokazuju rješenjem nadležnog organa o priznavanju prava na ličnu i porodičnu invalidninu za ratnog vojnog invalida odnosno člana porodice šehida, poginulog, umrlog, nestalog branioca ili umrlog ratnog vojnog invalida; o priznavanju prava na mjesečni novčani dodatak za dobitnike ratnih priznanja i odlikovanja i članove uže porodice poginulog, umrlog ili nestalog dobitnika ratnog priznanja ili odlikovanja; uvjerenjem nadležnog organa o periodu učešća u Oružanim snagama za demobiliziranog branioca, te na osnovu smrtnog lista i uvjerenja o učešću u Oružanim snagama umrlog demobiliziranog branioca, izdatog u skladu sa Zakonom o upravnom postupku ("Službene novine FBiH" broj 2/98 i 48/99).

Član 7. **(Isplata stipendije)**

Isplata stipendije vrši se u osam mjesečnih rata.

DIO DRUGI - NAČIN OSTVARIVANJA PRAVA

POGLAVLJE I. UVJETI ZA DODJELU STIPENDIJE

Član 8. **(Uvjeti)**

- (1) Pravo na dodjelu stipendije, lica iz člana 3. i 4. ove Uredbe mogu ostvariti pod uvjetom da:
- a) imaju prebivalište na području Kantona u trajanju od najmanje dvije godine neprekidno do dana podnošenja zahtjeva, osim povratnika u Republiku Srpsku;
 - b) oni i članovi njihovog porodičnog domaćinstva nisu vlasnici ili suvlasnici subjekta koji obavlja privrednu ili drugu djelatnost, registriranog kao privredno društvo;
 - c) prihod po članu domaćinstva istih ne prelazi iznos od 80% prosječne neto plaće isplaćene u Kantonu u prethodnoj godini;
- (2) Odredba stava (1) tačka c) ovog člana ne odnosi se na kandidate iz člana 3. tačka d) i e) ove Uredbe.

Član 9. **(Posebni uvjet)**

Lica iz člana 3. tačke d), e), f), g) i h) i člana 4. ove Uredbe, pravo na dodjelu stipendije mogu ostvariti za studij na visokoškolskoj ustanovi koji su upisali do navršene 25. godine života.

Član 10. **(Izuzeci)**

Pravo na dodjelu stipendije po ovoj Uredbi ne mogu ostvariti studenti koji:

- a) imaju status apsolventa;
- b) u tekućoj studijskoj godini na istom ili drugom fakultetu ponovno upisuju istu godinu studija;
- c) su na vanrednom studiju;
- d) primaju kredit ili stipendiju drugog davaoca;
- e) su studenti II ciklusa u radnom odnosu;
- f) su upisali studijsku godinu po osnovu bezuslovnog upisa, odnosno po osnovu člana 124. stav (5) Zakona o visokom obrazovanju ZDK („Službene novine ZDK 6/09, 09/13, 13 /13, 04 /15, 05/18, 4/19, 19/20).

POGLAVLJE II. POSTUPAK DODJELE STIPENDIJE

Odjeljak A. Konkurs

Član 11. **(Raspisivanje konkursa)**

- (1) Stipendije se dodjeljuju kandidatima izabranim po osnovu rezultata konkursa, kojeg za svaku studijsku godinu raspisuje Ministarstvo za boračka pitanja Zeničko-dobojskog kantona (u daljnjem tekstu: Ministarstvo).
- (2) Objavljivanje konkursa se vrši u jednom od dnevnih listova koji se distribuiraju na cijelom teritoriju Bosne i Hercegovine, nakon čega tekst konkursa Ministarstvo objavljuje na web stranici Kantona i dostavlja kantonalnim udruženjima branilaca i članova njihovih porodica.
- (3) Po dostavljenoj obavijesti Ministarstva u tom smislu, gradska/općinska služba isticanjem na oglasnoj ploči, putem web stranice grada/općine i lokalnih sredstava informisanja obavještava zainteresovane kandidate o objavljenom konkursu za dodjelu stipendija i mogućnosti podnošenja prijave na isti.

Član 12. **(Sadržina konkursa)**

Konkurs za dodjelu stipendija sadrži podatke o:

- a) licima koji su izuzeti od bodovanja u skladu sa ovom Uredbom;
- b) licima koja imaju pravo učešća na konkursu;
- c) kandidatima čije prijave neće biti uzete u razmatranje;
- d) kriterijima na osnovu kojih se vrši izbor kandidata;
- e) dokazima koje kandidati prilažu uz prijavu na konkurs;
- f) roku za prijavu na konkurs i organu kojem se ista podnosi.

Odjeljak B. Prijava na konkurs

Član 13. **(Podnošenje zahtjeva)**

- (1) Prijavu na konkurs sa potrebnom dokumentacijom kandidat podnosi gradskoj/općinskoj službi nadležnoj za poslove branilačko-invalidske zaštite u gradu/općini u kojoj ima prebivalište, odnosno u kojoj ostvaruje prava iz branilačko-invalidske zaštite ili u kojoj se nalazi na evidenciji nadležnog organa za vojne poslove (u daljnjem tekstu: gradska/općinska služba).

(2) Prijavu iz stava (1) ovog člana kandidat podnosi u vidu zahtjeva za dodjelu stipendije, na posebnom obrascu kojeg propisuje ministar Ministarstva u roku od osam dana od dana stupanja na snagu ove Uredbe.

Član 14. (Obavezna dokumentacija)

Uz prijavu na konkurs kandidat prilaže sljedeću dokumentaciju:

- a) dokaz o statusu branioca i člana njegove porodice;
- b) uvjerenje o kretanju (kao dokaz o prebivalištu);
- c) potvrdu o redovnom studiju;
- d) dokaz o ostvarenom uspjehu u prethodno završenoj školskoj/studijskoj godini (ovjerena kopija svjedočanstva/uvjerenje o ostvarenom prosjeku ocjena u prethodnoj studijskoj godini sa ovjerenom kopijom stranice indeksa koja sadrži podatke o ovjeri posljednjeg semestra);
- e) dokaz o nezaposlenosti studenta II ciklusa (uvjerenje nadležne Poreske ispostave o statusu osiguranika odnosno da se isti ne vodi u jedinstvenom sistemu uplate doprinosa);
- f) ovjerenu kućnu listu;
- g) uvjerenje o prosječnim prihodima zaposlenih za posljednja tri mjeseca računajući do dana objave konkursa, odnosno dokaz o nezaposlenosti punoljetnih članova domaćinstva (uvjerenje nadležne Poreske ispostave o statusu osiguranika odnosno da se isti ne vodi u jedinstvenom sistemu uplate doprinosa);
- h) ovjerenu kopiju Specifikacije za utvrđivanje dohotka od samostalne djelatnosti - obrazac SPR 1053 (koji se podnosi uz Godišnju poreznu prijavu/Godišnju prijavu dohotka) za prethodnu kalendarsku godinu;
- i) ovjerenu izjavu o ukupnim prihodima domaćinstva;
- j) ovjerenu izjavu da ne prima stipendiju po drugom osnovu;
- k) izvod iz matične knjige umrlih (za umrlog roditelja), a za razvedene roditelje pravosnažnu presudu o razvodu braka.

POGLAVLJE III. KRITERIJI ZA IZBOR KANDIDATA

Član 15. (Bodovanje)

Izbor kandidata za dodjelu stipendije vrši se na osnovu bodova ostvarenih primjenom kriterija utvrđenih ovom Uredbom.

Član 16. (Izbor kandidata bez bodovanja)

Izuzetno od odredbe člana 15. ove Uredbe, pravo na dodjelu stipendije bez bodovanja imaju:

- a) kandidati iz člana 3. tačka a) do tačke e) i člana 4. ove Uredbe;
- b) djeca ratnih vojnih invalida sa procentom invaliditeta 70% i više;
- c) kandidati sa procentom invaliditeta 70% i više.

Član 17.

Brisan.

Član 18. (Kriteriji)

(1) Bodovanje kandidata za dodjelu stipendije vrši se primjenom sljedećih kriterija:

- a) ostvaren uspjeh u prethodno završenoj školskoj/studijskoj godini;
- b) socijalno-ekonomska situacija;
- c) ratna priznanja, ratni staž i invaliditet.

(2) Kriterij iz stava (1) tačka c) ovog člana, odnosi se na roditelja po osnovu čijeg učešća u Oružanim snagama kandidat ostvaruje pravo učešća na konkursu.

Član 19. (Uspjeh u školovanju)

Po osnovu ostvarenog uspjeha (prosječna ocjena) u prethodnoj školskoj/studijskoj godini, kandidat ostvaruje bodove:

a) za studente prve godine:

- | | |
|---|----------|
| 1) izvrstan (prosječna ocjena 5) | 7 bodova |
| 2) odličan (prosječna ocjena iznad 4.5) | 5 bodova |
| 3) vrlo dobar (prosječna ocjena od 3.5 – 4.5) | 3 boda |
| 4) dobar (prosječna ocjena od 2.5 – 3.4) | 1 bod. |

b) za studente druge i ostalih godina:

- | | |
|---|-----------|
| 1) izvrstan (prosječna ocjena 5 odnosno iznad 9.5) | 10 bodova |
| 2) odličan (prosječna ocjena od 4.5 odnosno od 8.5 - 9.5) | 7 bodova |
| 3) vrlo dobar (prosječna ocjena od 3.5 – 4.4 odnosno od 7.5 - 8.4) | 5 bodova |
| 4) dobar (prosječna ocjena od 2.5 – 3.4 odnosno od 6.5 - 7.4) | 2 boda. |

Član 20. (Socijalno-ekonomska situacija)

(1) Po osnovu socijalno-ekonomske situacije, kandidatu pripadaju bodovi:

- a) po članu porodičnog domaćinstva 1 bod
- b) po članu porodičnog domaćinstva sa invaliditetom, utvrđenog rješenjem nadležne institucije 2 boda
- c) po osnovu prihoda po članu domaćinstva :

1) do 100 KM	15 bodova
2) od 101 do 200 KM	10 bodova
3) od 201 do 250 KM	5 bodova
4) od 251 do 300 KM	3 bodova
5) od 301 do 400 KM	2 boda.

(2) Ukupan prihod čine prihodi koje članovi domaćinstva ostvaruju po osnovu: plaća iz radnog odnosa; starosne, invalidske i porodične penzije; druge djelatnosti i dopunskog rada.

(3) Prihodom se ne smatra: novčana naknada po osnovu invaliditeta za tjelesno oštećenje; novčana naknada za nezaposlene; novčana naknada za pomoć i njegu drugog lica; dodatak na djecu, stipendije i krediti učenika i studenata; novčana egzistencijalna naknada za demobilizirane branioce.

(4) Dokazi o prihodima u smislu ove Uredbe su: uvjerenje pravnog lica o plaći zaposlenika, penzijski ček, izjava kandidata o prihodima svih članova sa kućne liste.

Član 21. (Ratna priznanja, ratni staž i stepen invaliditeta roditelja)

(1) Kandidatu čiji je roditelj dobitnik ratnog priznanja ili odlikovanja pripadaju slijedeći bodovi:

- a) ratno priznanje Red hrvatskog pletera 2 boda
 - b) ratna priznanja ili odlikovanja Srebrena policijska zvijezda i Srebreni štit 10 bodova
 - c) značka Zlatni ljiljan, Red hrvatskog trolista i ostala ratna priznanja ili odlikovanja 20 bodova.
- (2) Za svaki puni mjesec ratnog staža jednog roditelja, kandidatu pripada po jedan bod a za drugog roditelja pola boda.
- (3) Kandidatu, čiji je roditelj pristupio Oružanim snagama kao maloljetno lice ili šest mjeseci po punoljetstvu, pripada 10 bodova.
- (4) Kandidatima-djeci ratnih vojnih invalida, pripadaju bodovi po osnovu stepena invaliditeta roditelja:
- a) VI grupa 10 bodova
 - b) VII grupa 8 bodova
 - c) VIII grupa 6 bodova
 - d) IX grupa 4 boda
 - e) X grupa 2 boda.

POGLAVLJE IV. DONOŠENJE ODLUKE

Član 22. (Preliminarna lista)

- (1) Gradska/općinska služba u postupku po zahtjevu:
- a) pribavlja podatke o dodijeljenim stipendijama drugih davalaca, a u cilju eliminisanja iz postupka kandidata koji već ostvaruju stipendiju za studij po drugom osnovu;
 - b) vrši bodovanje prijavljenih kandidata koji ispunjavaju uvjete za dodjelu stipendije i sačinjava preliminarnu listu prvenstva.
- (2) Preliminarnu listu gradska/općinska služba ističe na oglasnoj ploči i web stranici grada/općine, te dostavlja gradskim/općinskim udruženjima branilaca i članova njihovih porodica.
- (3) Rješenje o odbacivanju neurednih zahtjeva, odnosno odbijanju zahtjeva kandidata koji ne ispunjavaju uvjete za dodjelu stipendije gradska/općinska služba donosi u skraćenom postupku na osnovu člana 139. stav 1. i 2. Zakona o upravnom postupku ("Službene novine Federacije Bosne i Hercegovine" broj 2/98 i 48/99).

Član 23. (Zahtjev za preispitivanje liste)

- (1) Nezadovoljni kandidati imaju pravo podnošenja zahtjeva za preispitivanje Preliminarne liste, koji mora bit obrazložen i utemeljen na dokazima koji potvrđuju tačnost iznesenih navoda.
- (2) Zahtjev iz stava (1) ovog člana podnosi se gradskoj/općinskoj službi najkasnije u roku od osam dana od dana isticanja liste.
- (3) Gradska/općinska služba je obavezna podnosioca zahtjeva pismeno obavijestiti o stavu po podnesenom zahtjevu.

Član 24. (Konačna lista)

- (1) Nakon razmatranja podnesenih zahtjeva, gradska/općinska služba sačinjava konačnu listu prvenstva kandidata za dodjelu stipendija, pri čemu je broj studenata kojima će stipendija biti dodijeljena u zavisnosti od visine utvrđenih budžetskih sredstava opredijeljenih za taj grad/općinu.

- (2) Iznos opredijeljenih budžetskih sredstava po gradovima/općinama određuje se na osnovu procentualnog učešća pripadnika branilačke populacije u odnosu na njihov ukupan broj u Kantonu.
- (3) Gradska/općinska služba ističe konačnu listu na oglasnoj ploči.

Član 25.
(Izdavanje rješenja)

- (1) Na osnovu konačne liste i obavijesti Ministarstva o visini i broju dodjeljenih stipendija kandidatima koji ispunjavaju uslove, gradska/općinska služba donosi rješenja o dodjeli stipendija izabranim kandidatima, u skladu sa članom 211. Zakona o upravnom postupku.
- (2) Kandidatima koji nisu ostvarili dovoljan broj bodova za dodjelu stipendije u skladu sa konačnom listom gradska/općinska služba izdaje rješenja o odbijanju zahtjeva u skraćenom postupku na osnovu člana 139. stav 1. i 2. Zakona o upravnom postupku.
- (3) O žalbi na rješenje gradske/općinske službe rješava Ministarstvo.

Član 26.
(Isplata stipendija)

- (1) Isplata stipendija se vrši putem gradskih/općinskih službi, po dostavljenoj odluci ministra Ministarstva o broju stipendija i iznosu doznačenih sredstava za svaki grad/općinu.
- (2) O doznačenim sredstvima za isplatu stipendija gradska/općinska služba obavještava korisnike putem medija i istim vrši isplatu putem tekućih računa.

DIO TREĆI - ZAVRŠNE ODREDBE

Član 27.
(Sredstva za ostvarivanje prava)

Sredstva za stipendiranje studenata-branilaca i članova njihovih porodica, osiguravaju se u Budžetu Kantona, u visini od najmanje 10% ukupnih budžetskih sredstava Ministarstva za boračka pitanja, a u skladu sa prilikom sredstava.

Član 28.
(Pravdanje sredstava)

Gradska/općinska služba je dužna Ministarstvu dostaviti pravdanje isplaćenih sredstava stipendija u roku od 15 dana po izvršenoj isplati.

Član 29.
(Evidencija)

Elektronsku evidenciju o podnesenim zahtjevima i korisnicima prava po ovoj Uredbi vode gradske/općinske službe i Ministarstvo, po posebnim obrascima koje propisuje ministar Ministarstva u roku od osam dana od dana stupanja Uredbe na snagu.

Član 30.
(Instrukcije i nadzor)

- (1) U realizaciji ove Uredbe, ministar Ministarstva može donijeti odgovarajuće instrukcije.
- (2) Nadzor nad provođenjem Uredbe ima Ministarstvo.

Član 31.
(Ravnopravnost spolova)

Sve imenice koje se odnose na branioce i članove njihovih porodica, upotrijebljene u ovoj Uredbi samo u muškom ili samo u ženskom rodu, odnose se na oba spola.

Član 32.
(Stavljanje Uredbe van snage)

Danom stupanja na snagu ove Uredbe prestaje važiti Uredba o stipendiranju branilaca i članova njihovih porodica ("Službene novine Zeničko-dobojskog kantona" broj 2/09 i 5/13).

Član 33.
(Ranije započeti postupci)

Svi slučajevi odnosno postupci koji do dana stupanja na snagu ove Uredbe nisu pravosnažno okončani, završit će se po odredbama propisa koji je bio na snazi u vrijeme podnošenja zahtjeva.

Član 34.
(Stupanje na snagu i objavljivanje Uredbe)

Uredba stupa na snagu danom donošenja, a ista će biti objavljena u "Službenim novinama Zeničko-dobojskog kantona".